



ПАВЕЛ АПОСТОЛДЫҢ ЕВРЕЙЛЕРГЕ САМАРАЗЫ

1

Кудайдың Уулы ангелдерден бийик

¹ Кудай өткөн чактарда жарчылар ажыра адаларыска улам сайын, жүзүн-жүүрлөп айдып туратан. ² Калганчы өйлөрдө Уулы ажыра биске айдар болды. Ол Уулын ончозын энчилер эдип тургускан, Ол ажыра орчыланды да жайаган. ³ Уулы Адазынын магыла жаркындалып, Онын сүр-кебери болуп жат. Ол Бойынын күчтү сөзи ажыра ончозына бар болуп жүрерге берип жат. Кинчектерди арутайтанын түгезеле, тенгериде Улу Кудайдын он жанына отуруп алган. ⁴ Ол алган ат-жол ангелдердийинен канча кире бийик, анча киреге Ол ангелдерден бийик боло берген.

⁵ Кудай ангелдердин кемизине качан-бир:

*«Сен – Менин Уулым,
бүгүн Сени туудым» –*

деп айткан ба? База:

*«Мен Онын Адазы болорым,
Ол Менин Уулым болор» –*

деп? ⁶ База, Тун Уулын орчыланта экелип турарда, айткан:

«Ого Кудайдын ончо ангелдери бажыржай».

⁷ Ангелдер керегинде дезе айткан:

*«Ангелдеринди салкындар эдедин,
жалчыларыңды от жалбыштары эдедин».*

⁸ Уулы керегинде дезе:

*«Сениң ширеен, Кудай, элен-чактарга тургай.
Сениң каандыгыңның күчи — чынның күчи болгой.*

⁹ *Сен чынды сүүдин, арамасты жаман көрдин.
Оның учун Кудай, Сениң Кудайың Сени майлап,
Сеге сүүнчини кожо жүргендеринге көрө көп берген».*

¹⁰ База айдылган:

*«Сен, Кайракан, озо баштап јерди төзөгөн,
Сениң колдорың тенгерини јайаган.*

¹¹ *Олор јоголып калар,
Сен — артып каларың;
ончозы кийим чилеп үлтүрөп калар.*

¹² *Олорды јабынтыны чылап түрүп,
кийимди чилеп солыырың.
Је Сен ол ло бойың,
Сениң јаштарың түгенбес».*

¹³ Кудай ангелдердин кемизине качан-бир:

*«Өштүлеринди будыңның алдына салып бербейинчем,
он јаныма отур» —*

деген бе? ¹⁴ Ангелдер ончозы Кудайга бажырып жүрген тындар эмес бе? Олор аргадашты алатан улуска жалчыланды деп ийилген эмес бе?

2

¹ Оның учун бис нени укканыстанг анчада ла бек тудунар учурлу. Онон башка бисти агын туура агыза берер. ² Ангелдер ажыра жарлалган сөс бек болгон, улус кажы ла јазыгы, уккур эмези учун чын кезедү алган. ³ Андый болгондо, баштап ла Кайракан бойы жарлаган мындый улу аргадашты јектеп турган болзобыс, кезедү албай канайып кыйыжарыс? Бу аргадаш керегинде уккан улус ол чын деп, биске лаптаган. ⁴ Кудай бойы да керелеп, билдилер, кайкалдар јайап, жүзүн-јүүр кайкамчылу күчтер көргүзип, Агару Тынды улуска Бойының табыла берген.

***Иисус карындаштарына
түңгейлешкен***

⁵ Кудай бис айдып турган келер ойдин орчыланын ангелдерге бактырбаган ине. ⁶ Же кем де Чийимнин бир јеринде керелеп, айткан:

*«Кижидегенин ол не,
оны сананып јүрерге?
Эмезе кижидегенин ол не,
ого кичеемел эдерге?»*

⁷ *Оны ангелдерден кыска ойгө јабыс эттин.*

Ого мактын ла күндүнүн веногын берип,

⁸ *онын буды алдына ончозын бактырдын».*

Кудай кижиге ончозын бактырып, ого бакпаган неме артырбаган. Же эмди ого ончозы бакты деп, эм тура көрбөйдис. ⁹ Же бис Иисусты көрдис. Ол ангелдерден кыска ойгө јабыс эдилген. Эмди Ого мактын ла күндүнүн веногы берилген, ненин учун дезе Ол өлүмнин кыйынын өткөн. Анайып Ол Кудайдын јакшылыгыла ончо улус учун өлгөн.

¹⁰ Кудайдын анайда эдери чын болгон. Ончозы Оныйы ине, ончозы Ол ажыра бар болуп јүрүп јат. Анайып Ол көп уулдарын макка экелейин деп, аргадаш берип турган Башчыны кыйналыштар ажыра толо кемдү эткен. ¹¹ Агарулап турганы ла агарулалып тургандары ончозы бир Ададан ине. Онын учун Иисус олорды карындаштар деп адаарга уйалбай, ¹² айдат:

*«Ады-јолынды карындаштарыма јарлаарым,
серкпе ортодо Сени мактап сарнаарым».*

¹³ База:

«Мен Ого бүдүмји саларым».

База:

«Бат Мен ле Меге Кудай берген балдар».

¹⁴ Бу балдар эттен ле каннан болгон учун, Иисус та олор чылап эттен ле каннан кижиде боло берген, өлүмди бийлеген көрмөсти Бойынын өлүми ажыра јоголтойын деп, ¹⁵ өлүмнен коркып, бастыра јүрүмине кулданышта јүргендерди јайымдайын деп. ¹⁶ Јарт эмей, Ол Бойына ангелдерди эмес, Авраамнын калдыктарын јуудып јат. ¹⁷ Онын учун Ол ончозында карындаштарга түңгейлежер учурлу болгон. Анайып Ол Кудайдын алдында буурсак ла чындык

Улу абыс боло берип, калыктын кинчектери учун Ого жарайтан тайылга эдер аргалу болгон. ¹⁸Ол Бойы кыйналып, бу ажыра четкен учун ченедип турган улуска болужар аргалу.

3

Иисус Моисейден жаан

¹Анайдарда, агару карындаштар, Кудайдын кычырузына каруу эдип, тенгеридеги жүрүмде туружа бердигер. Онын учун Иисус керегинде лаптап сананып көрүгөр. Ол – Кудайдын Элчизи ле Улу абыс. Ол керегинде жүрүмисле керелеп турубыс. ²Оны бу керекке тургускан Кудайга Ол чындык, Моисей де Кудайдын туразында чындык башкарганы чылап. ³Же Моисейге көрө Иисуска көп күндү эдилген, туранын бойына көрө оны туткан кижиге көп күндү эдиллип турганы чылап. ⁴Кажы ла тураны кем де тудуп жат эмей, же ончозын тудаачы – Кудай.

⁵Моисей де Онын туразында жалчы чылап чындык болгон. Ол керелезин деп тургузылып, келер өйдө айдылатанын жарлаган. ⁶Христос десе уулы чылап тургузылган, Онын туразында башкарсын деп. Онын туразы – ол бис, ачык-жарыгысты ла неле мактанып турганыска ижемјини бек чеберлеп алар болзобыс.

Жүректеригерди катуландырбагар!

⁷Онын учун Агару Тыннын айтканынча: «*Бүгүн Онын үнин уксагар, ⁸адаларыгар куба чөлдө ченедип турарда арбанышканы чылап, жүректеригерди катуландырбагар. ⁹Анда оло эдип жүргенимди төртөн жылдын туркунына көргөн дө болзо, Мени ченеп, шиндегендер. ¹⁰Онын учун бу үйеге чугулданып, айткам: „*Жаантайын азып жадылар, жүректери жолдорымды билбес*“. ¹¹Анайда чугулданып, оло Меге келип, амыр албас деп чертенгем».*

¹²Көрүгөр, карындаштар, кемигер жаман ла бүтпес жүректү болуп, тирү Кудайдан жана болзоын. ¹³Карын, эм тура «бүгүн» деп айдар арга бар тушта бой-бойыгарды күнүн сайын сергидигер. Көрүгөр, кинчекке төгүндедип, кемигер де катуланбазын. ¹⁴Баштап алган жүрүмисти бу бойынча учына жетире бек чеберлеп турсабыс, бис Христосло бирлик инебис. ¹⁵Бу керегинде айдылган: «*Бүгүн Онын үнин*

уксагар, адаларыгар куба чөлдө ченедип турарда арбанышканы чылап, жүректеригерди катуландырбагар». ¹⁶ Онын үнин угуп, арбанышкан улус кемдер болгон? Моисей Египеттен чыгарган улус эмес пе? ¹⁷ Ол төртөн жыл кемдерге чукулданган? Кинчек эдип, сөөктөри куба чөлдө артып калган улуска эмес пе? ¹⁸ Амыр албас деп, кемдерге чертенген? Ого бакпаган улуска эмес пе? ¹⁹ Анайып олоор бүтпегенинен улам амыр албаганын көрөдис.

4

Кудайдын калыгына „Субботтын амыры“

¹ Анайдарда, амыр алатаны керегинде Кудайдын берген сөзи күчин жылыткалак. Онын учун кемигер андый арганы божотпозын деп, айап жүрүгөр. ² Биске де, байагы улуска чылап, Сүүнчилү Жар жарлалган ине. Же ологорго уккан сөс туза экелбеген, ненин учун дезе оны жуутпай, бого бүтпегендер. ³ Бис дезе, бүткөн улус, амырды алып жадыбыс. Кудайдын айтканынча: *«Мен анайда чукулданып, олоор Меге келип, амыр албас деп чертенгем».* Телекейди жайаган өйдөн ала эдип жүргенин түгезип те койгон болзо, Ол анайда айткан. ⁴ Чийимнин бир жеринде жетинчи күн керегинде мынайда айдылган: *«Кудай эдип жүргенин ончозын түгезеле, жетинчи күнде амыраган».* ⁵ Мында ок олоор Менин амырымды албас деп айдылган.

⁶ Анайдарда, амыр алар кезик улус бар. Же башкыда кемдерге Сүүнчилү Жар жарлалган, олоор бакпаганнан улам амырды албаган. ⁷ Онын учун Кудай ойто катап *Бүгүн* деп күнди темдектеп жат. Ол бу күн керегинде көп өйлөрдиг бажында Давид ажыра өрө айдылганы чылап:

*«Бүгүн Онын үнин уксагар,
жүректеригерди катуландырбагар»* –

деген. ⁸ Ологорго Иисус Навин амыр берген болзо, мынын кийинде өскө күн керегинде айдылбас эди. ⁹ Анайдарда, Кудайдын калыгын «Субботтын амыры» сакып жат. ¹⁰ Амырды алган кижиге, Кудай Бойынын эдип жүргенинен амырап турганы чылап, бойындыын амырап жат ине. ¹¹ Андый болгондо, амырды аларга, ончо күчибисти салалы. Кудайга бакпас улустан тем алып, кем де өлүп калбазын.

¹²Кудайдын сөзи жүрүп, бойынын ижин эдет ине, ол кандый да эки мистү кылыштан курч: өзөк-буурга кирип, жуланы ла тынды, үйе-сөөктөрдү ле жиликти бөлүп, жүректин күүнин ле умзаныжын жаргылайт. ¹³Кудайга көрүнбес не де жок, Онын көзи алдында ончозы жылангаш ла ачык. Онын алдына каруу берерис.

Иисус – тегерини өткөн Улу абыс

¹⁴Анайдарда, бисте тегерини өткөн Улу абыс бар. Ол Иисус, Кудайдын Уулы. Онын учун Ого чындыгысты жүрүмисле керелеп, Онон бек тудуналы. ¹⁵Бистин Улу абызыс чине жогысты аайлаар аргалу. Ол бис чилеп ок ончозында ченелген, же кинчек этпеген. ¹⁶Анайдарда, жүрекерис ачык-жарык болуп, Кудайдын жакшылыгынын Ширезине жууктайлы. Анда бис өйлү-өйинде болуш ла быйан аларыс, жакшылык табарыс.

5

¹Кажы ла улу абыс улустан талдалат. Ол улуска болуп Кудайга жалчыланып, кинчектер учун берүүлөр ле тайылгалар эдер учурлу. ²Билбей жадып жастырып, азып жүрген улуска жымжак болор аргалу, ненин учун дезе ол бойы да чине жок кижичи. ³Мынан улам калык та учун, бойы да учун тайылга эдер учурлу. ⁴Улу абыстын күндүлү жамызын бойына бойы кем де алып болбос, оны жангыс Ааронды чылап ок Кудай кычырып алган кижичи алар. ⁵Анайып Христос то Улу абыс болор макты Бойына Бойы албаган. Же бу макты Ого Кудай берип, айткан: «Сен – Менин Уулым, бүгүн Сени туудым». ⁶Ол Чийимнин база бир жеринде айткан: «Сен – Мелхиседектий ок жамылу үргүлжиге абыс».

⁷Иисус жерде жүрген тужында өлүмнен аргадаар аргалу Кудайга тын үнденип, көстөри жашталып, жайнап мүргүген. Онон айап, Оны тооп жүргени учун Кудай Оны уккан. ⁸Ол Уулы да болзо, кыйналыштар ажыра уккур болорго үренип алган. ⁹Толо кемине жеделе, Ого уккур ончо улуска мөнкү аргадаштын төзөөчизи боло берген. ¹⁰Анайып Кудай Оны Мелхиседектий ок жамылу Улу абыс деп жарлаган.

Кудайга бүдеринде жалку болбогор

¹¹Бу керегинде көп айдар эдибис, же мыны слерге жартаарга күч, ненин учун дезе угарга боду боло бергенигер. ¹²Бу киреде слер үредүчилер болуп калар учурлу, же слерди Кудайдын сөзинин

баштапкы төзөлгөлөрине база катап үредер керек. Слерге сүт керек, кату курсак эмес. ¹³Сүтле азыранып жүрген не ле кижиде чыннын сөзин аайлаар ченемел жок. Ол жаш бала ине. ¹⁴Кату курсак десе толо кемдү улуска учурлалган. Олор ченемелдү болуп, жакшыны жаманнан ылгаштырар аргалу.

6

¹Онын учун онон ары толо кемдү болорго жүткүп, Христостун баштаны үредүлерине ойто бурулбайлы. Кудайга бүдери керегинде, өлүмге экелеечи керектерден мойнооры керегинде үредүни ойто баштайтаны биске керек жок. ²Креске түжери, кол салып алкаары, тирилери, мөнкү жаргы керегинде үредүге бурулбайлы. ³Бого Кудайдын табы болзо, мыны да эдерис. ⁴Бүтпей барган улусты кинчектерин алынзын деп, Кудайга ойто баштандырар арга жок ине. Олор бир катап Кудайдын жаркынында жүрген, тенгеринин сыйын билген ле Агару Тынды алган, ⁵Кудайдын сөзинин жакшызын ла келер чактардын ийде-күчтерин билип алган. ⁶Je онон туура барганда, кинчектерин алынзын деп, олорды Кудайга ойто баштандырар арга жок. Кудайдын Уулын бойлорында ойто катап кере тартып, Оны ончо улус алдында уятка түжүрип жадылар.

⁷Jer бойынын үстине улам жааган жагмырды ичип, ондо иштеп жүрген улуска тузалу түжүм өскүрип турганда, Кудайдан алкыш алат ине. ⁸Тегенек ле от-өлөн өскүрип турган jer десе неге де жарабас, ол удабастан каргышка калар, учы-түбинде өртөлип калар.

⁹Кару улузым! Мынайда айдып та турган болзобус, керектеригер жакшы деп, слер аргадаштын жолында деп, бүдүмжилү болуп турубус. ¹⁰Кудай чындык, Ол эдип жүргенигерди ле сүүжигерди ундыбас. Слер агаруларга болушканыгар, эмди де болужадыгар. Мынызыла Оны сүүп турганыгарды көргүзип жадыгар. ¹¹Бис десе кажыгар ла учына жетире анайда кичеензин деп күүнзейдис. Ол тушта иженип жүргенигер бүдүп калар. ¹²Слерди жалкуурбазын, je бүдүп, узак чыдажып, Кудайдын берер болгонын энчиленип турган улустан тем алзын деп күүнзейдис.

Кудайдын берген сөзи быжу

¹³ Кудай Авраамга сөзин берип турарда, *Бойы Бойыла чертенген*, ненин учун десе черт бергедий Бойынанг бийик не де јок болгон. ¹⁴ Ол айткан: «*Сени алкап, алкаарым да, калдыктарыңды көптөдип, көптөдөрим де*». ¹⁵ Анайып Авраам узак чыдажып, Кудайдын берер болгонын алган.

¹⁶ Улус бойынанг өрө турганыла чертенет ине. Олордын черти айткан сөсти лаптап, не ле блааш-тартышты түгезет. ¹⁷ Кудай да берер болгон энчизин алатан улуска Онын табы кубулбазын јарт көрзин деп күүнзеген. Онын учун берген сөзин лаптап, ого черт кошкон. ¹⁸ Сөс лө черт берип турганда, Кудайдын төгүндеер аргазы јок. Бу кубулбас эки неме Кудайдан корулаш бедиреп жүрген бойыбысты сүрекей кооттоп јат. Анайып биске берилген ижемјиден бек тудунып јадыбыс. ¹⁹ Бу ижемји жүрүмге быжу ла бек якорьдый. Ол Öргөөнин сыраңгай өзөгине, көжөгөнин ары јанына кирет. ²⁰ Анаар бистен озо биске болуп Иисус кирип, Мелхиседектий ок јамылу үргүлјиге Улу абыс боло берген.

7

Мелхиседек абыс

¹ Мелхиседек Салимнинг кааны ла Öрө турган Кудайдын абызы болгон. Авраам каандарды јенгеле, јанып келедерде, ол ого туштап, алкыжын берген. ² Авраам ого ончо јөөжөзинен онынчы үлүүни бөлүп берген. Баштапкыда, Мелхиседек деп ат чыннын кааны дегени. Анайда ок ол Салимнинг — амырдын кааны. ³ Ондо ада-эне де, уктөс тө јок, онын жүрүмининг бажы да, учы да јок. Ол Кудайдын Уулына түңгейлежип, абыс болуп үргүлјиге жүрет.

⁴ Көрзөгөр дө, ол кандый улу болгон эмеш! Улу адабыс Авраам бойы ого тапканынан онынчы үлүүни берген. ⁵ Левийдинг угынан абыстар боло берген эр улус калыктанг онынчы үлүүни алзын деп, Јасакта айдылган. Чокымдап айтса, олор база Авраамнын калдыктары да болзо, бойлорынын ок карындаштарынанг онынчы үлүүни алып јадылар. ⁶ Мелхиседек олордын угынан эмес болгон, је Авраамнанг онынчы үлүүни алып, оны, Кудайдын сөзи берилген кижини, алкаган. ⁷ Јааны кичүзине алкыжын берип турганында

аланзу жок. ⁸ Бу учуралда онынчы үлүүни өлүмдү улус алып жадылар. Ол тушта оны тирү деп кере бар кижилер алган. ⁹ Анайып онынчы үлүүни алаачы Левий бойы Авраам ажыра онынчы үлүүни берген деп айдарга жараар, ¹⁰ ненин учун десе, Мелхиседек Авраамга туштаарда, Левий адазынын өзөгинде жүрген.

***Иисус – Мелхиседектий ок
жамылу Абыс***

¹¹ Анайдарда, калыкка Левийдин калдыктарынан тудулган абыстардын абыстап жүргениле колбулу Жасак берилген. Олордын абыстап жүргени ажыра толо кемдү болор арга бар болзо, Аарондый эмес, Мелхиседектий ок жамылу өскө Абыс табылары не керектү болгон? ¹² Абыстап жүреринде кубулта болгондо, Жасак та кубулар учурлу ине. ¹³ Эмди айдып турган Абызыс өскө уктан болгон. Бу уктан десе кем де тагылдын жанында жалчыланып жүрбеген. ¹⁴ Кайраканыс Иуданын угынан деп, жарлу ине. Моисей бу уктын абыстары керегинде нени де айтпаган. ¹⁵ Мелхиседектий ок жамылу өскө Абыс табылып турганда, кубулта там иле көрүнөт. ¹⁶ Ол мөнкү жүрүмнин күчиле Абыс боло берген, кижилерге тургузылган Жасак эмес. ¹⁷ Кере бар: «*Сен Мелхиседектий ок жамылу үргүлжиге Абыс*». ¹⁸ Анайып озогы жакылта күч жок ло туза жок болгонынан улам токтодылат, ¹⁹ ненин учун десе Жасак нени де толо кемдү этпеген. Же биске эн артык ижемжи берилген, онын шылтузында Кудайга жууктап жадыбыс.

²⁰ Бу да чертле эдилген. Байагы улус черт жокко абыстар боло берген, ²¹ Иисус – чертле, ненин учун десе Ол керегинде айдылган: «*Кайракан чертенген, Ол санаазын өскөртпөс. Сен – үргүлжиге Абыс*». ²² Бу черттин шылтузында Иисус эн артык кереес бүдерин жеткилдеп берген. ²³ Ого үзеери байагы абыстар көп болгон, ненин учун десе өлүм олорго абыстап жүрерге бербей турган. ²⁴ Иисус десе үргүлжиге жүрүп, үргүлжиге абыстап жат. ²⁵ Онын учун Ол ажыра Кудайга келип турган улусты жаантайын аргадаар аргалу. Олор учун сураарга, Ол жаантайын жүрүп жат.

²⁶ Бисте шак андый Улу абыс болор учурлу. Ол агару, жек жок, ару, кинчектүлөрдөн бөлүлгөн, тенгериден бийикке көдүрилген. ²⁷ Ого байагы улу абыстар чылап, озо баштап бойынын кинчектери учун, онон калыктын кинчектери учун күнүн сайын тайылга эдери керек жок. Ол Бойын Бойы тайып, мыны бир катап ла үргүлжиге

эткен. ²⁸ Жасак бойында чине жок улусты улу абыска тудуп жат. Кудай дезе Жасактын кийнинде черт ажыра үргүлжиге толо кемдү Бойынын Уулын Улу абыска туткан.

8

Жаңы кереестин Улу абызы

¹ Айдып турганыстын төс учуры неде дезе, бисте тенгеридеги Улу Кудайдын ширеезинин он жанында отурган Улу абыс бар.

² Ол агару жерде, чын чадырда абыстап жат. Бу чадырды кижиге эмес, Кайракан туткан.

³ Кажы ла улу абыс берүүлөр ле тайылгалар эдерге тудулат. Онын учун бу да Улу абыста тайатан не де болор учурлу болгон. ⁴ Анайдарда, Ол жерде артып калган болзо, абыс болбос эди, ненин учун дезе мында Жасакла Кудайга берүүлөр эдип турган улус бар. ⁵ Олор тенгеридеги немелердин сүр-кебери ле көлөткөзи болгонды эдип жадылар. Бат онын учун Моисей Кудайга бажыратан чадыр эдерге жадарда, Кудай айткан: *«Көр, ончозын сеге кырда көргүскен сүр-кеберле эт»*. ⁶ Же эмди Иисус, байагы абыстарга көрө, артык абысташ алган. Онын абыстажы, Кудай ла улус ортодо Ол жөптөгөн кереес канча кире артык, анча киреге артык болуп жат. Бу кереес Кудайдын эн артык берген сөзине төзөлгөн.

⁷ Баштапкы кереес жик жок болгон болзо, өскөзи керек жок болор эди. ⁸ Же Кудай каарып айдат:

*«Бат, күндөр келип жат, — деп, Кайракан айдат, —
Мен Израильдин калыгыла, Иуданын калыгыла
жаңы кереес жөптөбүрүм.*

⁹ *Бу кереес омордын адаларыла жөптөгөнүмдиге болбос.*

*Ол тушта Египет жеринен чыгарайын деп,
олорды колынан туткам.*

*Олор Менин керезимди бускан,
онын учун Мен оморды жектеп койгом — деп,
Кайракан айдат.*

¹⁰ *Израильдин калыгыла бат бу кереести жөптөйтөн*

*күндөр келер — деп, Кайракан айдат:
жасактарымды санааларына салып,
жүректерине бичиirim.*

*Мен олардын Кудайы болорым,
олор Менин калыгым болор.*

- ¹¹ *Кажы ла кижги айылдажын,
кажы ла кижги карындажын үретпес,
Кайраканды билип ал – дебес.
Ончозы, јаанду-јаштузы Мени билип јүрер.*
- ¹² *Олор јарамасту да болзо,
олорго быйан эдерим,
кинчектерин база эске албазым».*

¹³ Бу кереести Кудай «јангы» деп адап, баштапкызы эскирген деп жарлаган. Ұлтүреп, эскирип турганы, удабастан јоголып калар.

9

Јердеги ле тенгеридеги агару јер

¹ Анайдарда, баштапкы кереес Кудайга бажырар ээжилерлү ле јерде тудулган агару јерлү болгон. ² Чадыр тудулган, онын баштапкы кыбында јарыткыш, стол ло агарулалган калаш болгон. Бу јерди агару дейтен. ³ Экинчи көжөгөнин ары јанында агарудан агару дейтен кып болгон. ⁴ Анда фимиам өртөйтөн алтын тагыл ла кереестин ковчеги турган. Ковчег ончо јандай алтындалган. Онын ичинде манналу алтын аяк, Аароннын бүрленип чечектеген тайагы, анайда ок кереес бичилген јалбак таштар болгон. ⁵ Ковчегтин үстинде мактулу херувимдер* болгон. Олор кинчектер ташталып турган јердин үстине канаттарын јайгандар. Је эмди бу керегинде толо айдары керек јок.

⁶ Агару јер бат анайда јазалган. Баштапкы кыпка абыстар јаантайын кирип, Кудайга бажырып јадылар. ⁷ Экинчи кыпка дезе јылына бир катап јүк улу абыс кирет. Ол бойыла кожо тайылган тындунын канын экелип, оны бойы учун ла калык билбей јадып эткен кинчектер учун тайар учурлу. ⁸ Мынызыла Агару Тыннын көргүзип турганы бу: эм тура баштапкы чадыр бар тужында агарудан агару јер јаар јол ачык эмес. ⁹ Баштапкы чадыр эмдиги өйгө сүр-кебер болуп јат. Анда эдилеп турган берүлер де, тайылгалар да Кудайга бажырып турган кижини толо кемдү эдип, онын өзөк-буурын бурулу

* Кереес ковчегтин үстиндеги канатту сүрлер.

болгон сезимнен арутап болбос. ¹⁰ Олор ичип-јириле, жүзүн-жүүр арутанар чүм-јандарла, кижинин эди-каны јанынан ээжилерле колбулу. Бу ээжилер жүк кубулта болор өйгө јетире тузаланылат.

¹¹ Је Христос, эдилген бар јакшынын Улу абызы болуп, эн јаан ла толо кемдү агару чадыр ажыра келген. Бу чадыр кижинин колыла тудулбаган, ол бу телекейдин јайааны эмес. ¹² Ол агарудан агару јерге эчкилердин ле бозулардын канын эмес, Бойынын канын та-йып кирген. Ого бир катап ла үргүлјиге кирип, ончобыска мөнкү јайым алган. ¹³ Эчкилердин, букалардын канын ла кунајыннын кубалын үрүстеп, быјарсыган улусты арутап јадылар, эди-каны ару болзын деп. ¹⁴ Је Христостын каны мынан көпти эдет. Ол мөнкү Тын ажыра Бойын Кудайга јек јок тайылга эдип берген. Онын ка-ны санаабысты өлүмге экелеечи керектерден арутаар. Анайып ти-рү Кудайга бажырып жүрер аргалу болорыс. ¹⁵ Онын учун Христос јангы кереесте Ортокчы болуп јат. Ол Бойынын өлүми ажыра баштапкы кереес тужында јазык эткен улуска јайым берген. Кы-чырылган улус Кудайдын берер болгон мөнкү энчизин алар арга-лу болзын деп, Онын анайда эткени ол.

¹⁶ Кереес бар тушта оны бичиген кижинин өлүми керелелер учурлу. ¹⁷ Кизи өлгөн кийинде кереес учурлу болуп јат ине. Је ол тирү тужында кереесте учур јок. ¹⁸ Онын учун баштапкы да кереес канла јөптөлгөн. ¹⁹ Јасакта салылган јакылталарды ончо калыкка айдып береле, Моисей бозулардын ла эчкилердин канын, анайда ок суу, кызыл түк ле иссоп алып, түрбектин бойын ла ончо ка-лыкты үрүстеп, ²⁰ айткан: «*Бат, кереестин каны. Бу кереести слерге Кудай берген*». ²¹ Анайып ок канла чадырды ла Кудайга бажырап тужында тудунар-кабынар ончо немелерди үрүстеген. ²² Чындап та, Јасакла болзо ончозына шыдары канла аруталар, кан төгүлбе-йинче, кинчек ташталбас.

***Христостын тайылгазы
бир катап ла үргүлјиге***

²³ Анайдарда, тенгеридезине түнейлеп эдилген немелер андый тайылгаларла аруталар учурлу болгон. Је тенгеридеги немелердин бойына мынан артык тайылгалар керек. ²⁴ Христос чын немеге тү-нейлеп кижинин колыла туткан агару јерге кирбеген ине. Је Ол биске болуп эмди Кудайдын алдына турарга, тенгеринин бойына кирген. ²⁵ Агару јерге јылдын сайын өскө канла кирип турган улу

абыс чылап, Ол Бойын көп катап тайарга эмес тенериге кирген. ²⁶ Онон башка телекей жайалганынан ала Ого көп катап кыйналарга келижер эди. Же Ол чактардын учунда Бойын тайып, кинчекти жоголтойын деп, бир катап ла жажына келген. ²⁷ Кажы ла кижжи бир катап өлүп, онон жаргынын алдына туруп жат. ²⁸ Анайып Христос то көп улустын кинчектерин жоголторго, бир катап тайылган. Ол экинчи катап кинчекти таштаарга келбес, Оны сакып жүрген улусты аргадаарга келер.

10

¹ Жасак – келер өйдө болотон жакшынын жүк көлөткөзи, чын керектердин сүр-кебери эмес. Ол жылдын сайын жаантайын бир түнгей тайылгалар эдерин некейт. Же бу ажыра Кудайга бажыраарга келип турган улусты толо кемдү эдип болбойт. ² Онон башка, Кудайга бажырып турган улус тайылгалар этпей барар эди, ненин учун дезе, озор бир катап аруталала, кинчектер учун бурузын сеспес эди. ³ Карын, бу тайылгалар жылдын сайын кинчектер керегинде эске алындырып жадылар. ⁴ Букалардын ла эчкилердин каны кинчектерди жоголтор аргазы жок ине. ⁵ Онын учун Христос телекейге келип,

*«Сен тайылгаларды ла берүлерди күүнзебедин,
је Сен Мени эт-канду болзын деп күүнзеген.*

⁶ *Өртөн тайатан тайылгаларды да,
кинчек учун тайылгаларды да жаратпайдыг –*
⁷ дейле,

*„Бат Мен! Э-э, Кудай,
түрбекте Мен керегинде бичилгениле,
табынды бүдүрейин деп келдим!“ –*

деген. ⁸ Ол озо баштап: «Сен Жасакла эдилеп турган берүлерди де, өртөн тайатан тайылгаларды да, кинчектер учун тайылгаларды да күүнзебедин» – дейле, ⁹ онон: «Бат, табынды бүдүрейин деп келдим» – деген. Мынызыла Ол экинчизин тургузарга, баштапкызын токтодып жат. ¹⁰ Онын табы неде дезе, Иисус Христостын эди-каны бир катап ла үргүлжиге тайылганы ажыра агарулалдыс.

¹¹ Кажы ла абыс күнүн сайын туруп, Кудайга бажырып, кинчектерди качан да жоголтып болбос бир түнгей тайылгаларды көп катап тайат. ¹² Христос дезе, кинчектер учун бир тайылга эдип,

Кудайдын он жанына үргүлжиге отурып алган. ¹³Ол өйдөн ала Онын өштүлери будынын алдына салылганча сакып жат. ¹⁴Бир тайылга ажыра Ол агарулалып турган улусты үргүлжиге толо кемдү эткен ине. ¹⁵Ол керегинде биске Агару Тын керелейт. Айдылган жок беги:

¹⁶ «Мен ологго кереес беретен күндөр келер – деп,

Кайракан айдат, –

Мен жасактарымды жүректерине салып,

санааларына бичишим.

¹⁷ *Кинчектерин ле жарамастарын база эске албазым».*

¹⁸ Кайда кинчектер ташталган, анда тайылга эдилбес.

***Бүдүп ле иженип жүргенистен
кыйбазынаг тудунактар***

¹⁹ Анайдарда, карындаштар, тидим болуп, Иисустын канынын болужыла агарудан агару жерге кирер аргабыс бар. ²⁰Ол биске көжөгө ажыра – Бойынын эди-каны ажыра жүрүмнин жангы жолун ойто ачкан.

²¹ Бисте Кудайдын туразында башкарарга тургузылган Улу абыс бар. ²²Айдарда, ачык-жарык жүректү болуп, толо бүдүп, жүректеристи кинчектү санаадан арутап, эди-каныбысты ару суула жунуп, Кудайга келектер. ²³Неге бүдүп ле иженип жүргенистен кыйбазынаг тудунактар, ненин учун дезе сөзин берген Кудай чындык. ²⁴Сүүрге ле жакшы керектер эдерге көкүдижип, бой-бойыбыска ажарынкай бололы. ²⁵Жуундарыста жок болуп калбай туралы, кезик улуста андый темигү бар. Онын ордына Кайраканнын күни жууктап келеткенин көрүп, бой-бойыбысты мынан артык сергидектер.

²⁶Чынды билип, өнөтийин кинчек эдип турган болзобус, биске кинчектерис учун тайылга жок ине. ²⁷Ол тушта коркышту жаргыны ла калапту отты сакыыры артат. Бу от Кудайга удурлажып турган улусты жуда салар. ²⁸Моисейдин Жасагын жектеген кижини эки эмезе үч керечи бар болзо, килебей өлтүрүп туратан. ²⁹Андый болгондо, Кудайдын Уулын тепсеп, кереестин каныла аруталган бойы, оны агару эмес деп бодоп, жакшылыктын Тынын жамандап турган кижини канча кире кату кезедү алар? ³⁰Мынайда айтканды билер инебис: «Мен өч аларым, Мен жандыра берерим». База: «Кайракан Бойынын калыгын жаргылаар».

³¹Тирү Кудайдын колына кирери коркышту! ³²Башкыдагы күндеригерди эске алыгар. Ол тушта Кудайдын жарыгыла жарыдылган

бойыгар кыйналып, јаан тартыжуны чыдажып өттигер. ³³Кезикте слерди ончо улус көзинче жамандап, кыйнагандар, кезикте слердий ок айалгада жүрген улуска коштой болгоныгар. ³⁴Слер кижендүлерле кожо кыйналдыгар, жөөжөгөрдү тоноордо сүүндигер, ненин учун десе слерде тенериде мынан артык ла мөнкү жөөжө барын билер болгоныгар.

³⁵Анайдарда, тидим болуп артыгар, ол учун слерге улу кайрал болор. ³⁶Кудайдын табын бүдүрүп, Онын берер болгонын аларга слерге чыдамкай болор керек. ³⁷База ла эмеш, *келер учурлу Кудай једин келер, саадабас.* ³⁸*Менин акту кижим десе бүдүп, жүрер. Је јана болгоны Менин күүниме јарабас.* ³⁹Бис десе јана болуп, өлүмге барып јаткан улустан эмезис. Је бис жүрүмисти чеберлеп аларга бүдүп јадыбыс.

11

Кудайга бүткени ажыра

¹Кудайга бүдери – ол неге иженип жүргениске бүдүмјилү болоры. Ол көрүнбей турган немелерди чын эдет. ²Бүткени ажыра улу адалар Кудайдан јараду алган.

³Бүткенис ажыра орчылан Кудайдын сөзиле јайалган деп, көрүнип турган немелер көрүнбей тургандарынан табылган деп, аайлап јадыбыс.

⁴Бүткени ажыра Авель Кудайга Каиндийинен артык тайылга эткен. Бүткени ажыра ол акту кижиде деп, Кудайдан кере алган, ненин учун десе онын тайылгазын Кудай бойы јараткан. Бүткениле ол, өлүп калган бойы, эмдиге айтканча.

⁵Бүткени ажыра Енох јердин үстинен алылып, өлүм көрбөгөн. *Оны таап болбогондор, ненин учун десе оны Кудай Бойына алып алган.* Ол јерден алылардан озо Кудайга јараган деп, ого кере берилген ине. ⁶Бүтпей јадып десе Кудайга јараар арга јок. Ол бар деп, Оны чын бедиреп жүрген улуска кайрал болор деп, Кудайга келип турган кижиде бүдер учурлу.

⁷Бүткени ажыра Нойго көрүнбей турганы озолондыра айдылган. Ол Кудайдан аяап, айлы-јуртын аргадаарга ковчег туткан. Бу ок бүткени ажыра ол телекейди јаргылап, бүткени ажыра берилип турган акту болорын энчи эдип алган.

⁸Бүткени ажыра Авраам Кудайдын кычырузын угуп, энчи эдип алатан јерге барган. Ол кайдаар барып јатканын билбей, жүре берген.

⁹ Бүткени ажыра ол Кудай берер болгон жерде өскө орооннын кижизи чилеп жүрген. Ол андый ок энчи алар болгон Исаакла, Иаковло кожо чадырларда јаткан. ¹⁰ Авраам мынайда жүрүп, Кудай чүмдеп туткан бек төстү каланы сакыган.

¹¹ Бүткени ажыра Сарра, бала таппас бойы, жажай да берген болзо, барланган. Ол сөзин берген Кудай чындык деп билген. ¹² Анайып Авраамнан, јетпезине өлүмжиреп калган кижиден, тенеридеги жылдыстардый, талайдын јарадындагы кумактый тоо јок калдыктар туулган.

¹³ Олор ончозы өлөрдин өлгөнчө Кудайга бүткендер. Онын берер болгонын албагандар, је мыны жүк ыраагынан көрүп, ого сүүнип, бис жерде өскө орооннын улузы, туш-туура улус деп, бойлоры керегинде ачыгынча айдып жүргендер. ¹⁴ Мынайда айдып жүрген улус алтайын бедиреп турганын көргүзип јат ине. ¹⁵ Олор чыгып барган алтайын сананган болзо, ого бурулар аргалу болор эди. ¹⁶ Је олор мынан артыгына – тенеридеги төрөлине јүткүген. Онын учун Кудай да олордын Кудайы деп ададарга уйалбайт. Ол бу улуска кала белетеп койгон ине.

¹⁷ Бүткени ажыра Авраам Исаакты тайган. Оны Кудай ченеп турарда, Кудайдын берген сөзин алган бойы, сок јангыс уулын тайарга белен болгон. ¹⁸ Бу уулы керегинде айдылган: «*Сенин калдыктарын Исаактан болор*». ¹⁹ Кудай өлгөн улусты тиргизер аргалу деп, Авраам бодогон. Сүрлеп айтса, ол бойынын уулын өлүмнен кайра алган.

²⁰ Бүткени ажыра Исаак Иаковко ло Исавка келер өйгө алкыжын берген.

²¹ Бүткени ажыра Иаков өлөр алдында Иосифтин кажы ла уулына алкыжын берип, *тайагына јөлөнип, Кудайга бажырған*.

²² Бүткени ажыра Иосиф өлөр алдында Израильдин улусы Египеттен чыгып баратанын эске алындырып, сөөгин кайда тудатанын јакыган.

²³ Моисей тууларда, оны ада-энези бүткени ажыра үч ай јажырған. Бала кеен-јараш болгонын көрүп, олор кааннын јакарузын бузарга коркыбагандар. ²⁴ Бүткени ажыра Моисей, чыдап келеле, фараоннын кызынын уулы деп ададарынан мойногон. ²⁵ Удурум, кинчектү макатыш алганча, Кудайдын калыгыла кожо кыйналып жүрерин артыксынган. ²⁶ Ол келер өйдөгү кайралды сананып, Христоско болуп јамандадарын Египеттин эрјинезинен баалу деп бодогон. ²⁷ Бүткени ажыра ол Египетти таштап, каан чугулданат деп

коркыбаган. Ол көрүнбес Кудайды көрүп турган чылап, чыдамкай болгон ине. ²⁸ Бүткени ажыра ол Пасханын тайылгазын эдип, эжиктердин жаактарын канла үрүстеген, жайрадаачы-ангел тун балдарга тийбезин деп.

²⁹ Бүткени ажыра Израильдин улузы Кызыл талайды кургак жерле чилеп кечкен. Египеттин улузы база кечейин дейле, чөнүп калган. ³⁰ Бүткени ажыра Израильдин улузы жети күннин туркунына Иерихонды эбире баскан кийнинде каланын стенелери жемириле берген.

³¹ Бүткени ажыра балыр жүрүмдү Раав бакпас улусла кожо өлбөгөн, ненин учун дезе кайучылдарды айлына күүнзеп жуудып алган.

³² База нени айдайын? Гедеон, Варак, Самсон, Иеффай, Давид, Самуил ле жарчылар керегинде айдарга меге ой жетпес. ³³ Олор бүткени ажыра каандыктарды женген, чынды жайаган, Кудайдын берер болгонын алган, арсландарды жобожыткан, ³⁴ оттын жалбыжын өчүргөн, кылыштын мизинен аргаданган, чине жок бойлоры күч алган, жуу-согушта катан боло берген, өскө жердин черүлерин сүргөн. ³⁵ Үй улус бойлорынын өлүп калгандарын ойто тирүге алган. Кезиктери кыйнадып, мынан артык жүрүмге тирилерге, жайымнан мойногон. ³⁶ Өскөлөри электеткен, камчылаткан, анайда ок кынжылаткан, түрмеде отурган, ³⁷ ташла шыбалаткан, киреле кестирген, кылыштан өлгөн, кой ло эчки терези кийимдү тенип жүргөн, жоксыраган, кыйналган, базынчыкта жүргөн. ³⁸ Телекей бу улуска жарамык эмес болгон. Олор куба чөлдөрдө, кырларда, куй-таштарда ла капчалдарда азып-тозуп жүргендер.

³⁹ Олор ончозы бүдүп, ол керегинде кере алган. Же Кудайдын берер болгонын албаган, ⁴⁰ ненин учун дезе, олор бисле кожо толо кемине жетсин деп, Кудай биске артык болгонды белетеп койгон.

12

Кудай бисти таскадат

¹⁻² Онын учун бисти эбире андый көп керечилер бар болуп, базырып турган не ле жүкти, капкыр кинчекти бойыбыстан алып, туура таштайлы. Иисуска көрүп, биске темдектелген тартыжуны чыдамкай болуп өдөли. Ол ажыра Кудайга бүдүп баштайдыс, бүдүп жүргенис толо кемине једет. Ого темдектелген сүүнчинин ордына Ол уйатка каларын керекке албай, керү агашта кыйынды

чыдажып өдүп, Кудайдын ширезинин онг жанына отуруп алган. ³Кинчектү улустын удурлашканына чыдашкан Иисус керегинде шүүп көрүгөр. Ол тушта чинегер чыкпас, сүригер түшпес.

⁴Кинчекке удур тартыжуда эм тура кан төгүлгенче удурлашпадыгар, ⁵слерге уулдарына чылап мынайда айдылган коот сөстөрди ундып койдыгар: «Уулым, сени Кайракан кезедип турганда, мыны жектебе, каарып айдып турганда, сүринг түшпезин, ⁶ненин учун десе Кайракан сүүп турган кижизин кезедет, Бойына жуудып турган кажы ла уулын камчылайт». ⁷Кезедүге чыдажып турганыгарда, Кудай слерле Бойынын уулдарыла чылап тудунып жат. Адазы кезетпей турган уул бар эмеш пе? ⁸Ончо уулдар кезедилер учурлу. Кезедилбей турган болзогор, слер уулдары эмезигер, слер – сураc балдар.

⁹Анайда ла бисти жердеги ада-энебис кезедип туратан, бис олондон айап жүргенис. Андый болгондо, жүрүм жүрерге, тындардын Адазына ононг артык багар учурлу эмезис пе? ¹⁰Бисти жердеги адаларыс кыска ойгө лө бойлары чын деп бодогоныла кезеткен. Тенеридеги Ада десе биске чын туза болзын, Онын агарулыгында кожо турушсын деп кезедет. ¹¹Кандый да кезедү эдилеп турганда, сүүндирбей, кунуктырат. Мынын кийнинде бу ажыра үредип койгон улуска амыр ла акту жүрүм берет.

Кудайдын жакшылыгын жектебегер

¹²Онын учун бош салынган колдорыгарды ла уйдадай берген тизегерди тынгыдыгар. ¹³Аксак бут бертинбезин, карын, жазылзын деп, будыгардын алдында жолды түс эдигер. ¹⁴Ончо улусла амыр жадарга, агару жүрүмдү болорго кичеенигер. Бу жокко Кайраканды кем де көрүп болбос.

¹⁵Көрүгөр, кем-кем Кудайдын жакшылыгы жокко артып калбазын, кандый-бир ачу тазыл өзүп, түбек этпезин, бу ажыра көп улус быжарсыбазын. ¹⁶Ортогордо балыр жүрүмдү эмезе байланбас Исавтый кижиге болбозын. Ол бир катап ажанарга болуп бойынын тун уул деп адалганын садып ийген. ¹⁷Слер билер инегер, ол мынын кийнинде алкыш алайын дейле, жектедип койгон. Ыйлап сураган да болзо, эдип койгонын кубултып болбогон.

¹⁸Слер тудуп көрөр аргалу немеге, жалбыраган отко, карануйга, карачкыга, жотконго, ¹⁹амыргынын табыжына ла айдып турганын үнине жууктабадыгар. Бу үнди уккан улус сөсти база укпасака жайнаган. ²⁰Мындый жакаруны чыдажып угуп болбой тургандар:

«Кырга тынар-тынду да тийип ийзе, ташла шыбалалар». ²¹ Бу көрүлте коркышту болуп, Моисей айткан: «Мен коркып, тыркыражып жадым». ²² Же слер Сион кырга ла тирү Кудайдын калазына, тенгеридеги Иерусалимге ле түмен ангелдерге жууктадыгар. ²³ Слер тун туулган улустын байрамдык жуунына келдигер. Олордын ады-жолдоры тенгериде бичилген. Слер ончозын жаргылаачы Кудайга, толо кемине жеткен актулардын тындарына келдигер. ²⁴ Слер жангы кереестинг Ортокчызы Иисуска келип, арутап турган канга жууктадыгар. Бу кан Авельдинг канынанг артык керелейт.

²⁵ Көрүгөр, айдып турган Кудайды угарга мойнобогор. Байагы улус ологро жерде айдып турганды угарынанг мойноп, кезедүни кыйыжып болбогон. Анчада ла биске тенгериден айдып турганды угарынанг мойнозобус, кезедүни кыйыжып болбозыс. ²⁶ Ол тушта Онын үни жерди жайкаган. Эмди дезе, сөзин берип, айдат: «База катап жангыс та жерди эмес, тенгерини де жайкаарым». ²⁷ «База катап» дегени жайканбас немелер артсын деп, жайалган немелер жайканып ырадыларын көргүзет.

²⁸ Анайдарда, жайканбас каандыкты алып, жакшылыкты чеберлейли. Бу ажыра Кудайды тооп ло Онон аяап, Ого жараар эдип бажырып жүрели, ²⁹ ненин учун дезе, бистинг Кудайыс — ол жуда салар от.

13

Карындаштар чылап жүрүгөр

¹ Бой-бойыгарды карындаштарды чылап сүүгөр. ² Күндүзек болорын ундыбагар. Күндүзек болгоныла кезик улус бойлоры билбей, айлына ангелдерди жууткан эди. ³ Кыңылу улусты эзеп жүрүгөр, бойыгар да олорло кожо кыңылу чылап. Кыйналып жүрген улусты эзеп жүрүгөр. Слер бойыгар да жерде жүрүп жадыгар. ⁴ Айылду болгон улус бой-бойын тооп жүрзин, олордын төжөгине кир жукпазын. Балыр жүрүмдү ле чайдам улусты Кудай жаргылаар ине. ⁵ Акчага үстүкпегер, не барыгарла болорзыныгар. Кудай бойы айткан жок беди: «Сени артырбазым, сени таштабазым». ⁶ Онын учун тидим айдадыс: «Кайракан — менин болушчым, коркыыр немем жок. Кижиге меге нени эдер?»

⁷ Слерге Кудайдын сөзин жарлаган башчыларды сананып жүрүгөр. Олор жүрүмин канайда түгескенин көрүп, бүдеринде олордонг тем алыгар. ⁸ Иисус Христос — кече, бүгүн ле үргүлжиге ол ло бойы.

⁹ Слерди жүзүн-жүүр ле өскө үредүлер жолдон астыктырбазын. Жү-ректеригерди курсакла эмес, жакшылыкка тынгыдыгар, онызы жакшы. Курсакка болуп жүрген улус туза албас.

¹⁰ Бисте тагыл бар, чадырда абыстап жүргендер онон курсак алып жиир жаңы жок. ¹¹ Кинчек учун тайылган тындулардын канын агару жерге улу абыс кийдирет ине, же эдин одунын ары жанында өртөйдилер. ¹² Онын учун Иисус та Бойынын каныла калыкты агарулаарга, каланын каалгазынын ары жанында кыйнадып койгон.

¹³ Анайдарда, Онын базынчыгын бойыска алынып, одунын ары жанына Ого чыгып баралы. ¹⁴ Мында бисте жаантайын болор кала жок ине, бис келер ойдин калазын бедирейдис. ¹⁵ Анайдарда, Иисус ажыра Кудайга жаантайын макташтын тайылгазын эдип туралы – Онын ады-жолын жарлап турган эриндеристин сыйын. ¹⁶ Анайда ок жакшыны эдерге ле өскө улусла үлежерге ундыбагар. Андый тайылгалар Кудайга жарап жат.

¹⁷ Башчыларга уккур болуп, багыгар. Олор слердин жүрүмгерди сананып, көс жумбайдылар ине, ненин учун десе Кудайга каруу берер учурлу. Олор улу тынбай, сүүнип иштезин. Онон башка слерге кандый да туза болбос.

¹⁸ Бис учун мүргүгер. Санаабыс ару деп, бүдүмжилү инебис, ненин учун десе ончозында чын эдип жүрерге күүнзейдис. ¹⁹ Анчада ла сурап турум: Кудай мени слерге ойто ылтап ийзин деп мүргүгер.

²⁰ Мөңкү кереестин каны ажыра койлордын улу Күдүчизи боло берген Иисус Кайраканысты тиргискен амырдын Кудайы ²¹ слерди Бойынын табын бүдүрсин деп, не ле жакшы керекте түзеткей, Иисус Христос ажыра Бойына жараарын слердин бойыгарда жайагай. Ого элен-чактарга мак! Аминь.

²² Слерди сурап турум, карындаштар, бу көкүдү сөстөрди жуудып алыгар. Мен слерге кыскарта бичиген инем.

²³ Тимофей карындажыс жайымдалганын билигер. Ол удабас келзе, слерди оныла кожо көрөрим.

²⁴ Ончо башчыларыгарга ла ончо агаруларга эзен айдыгар. Италиядан карындаштар слерге эзен айдып турулар.

²⁵ Кудайдын жакшылыгы ончогорло кожо болгой*.

* Кезик жебрен түрбектер «Аминь» деп сөслө түгенет.